



Broj: 02-04-862/20
Datum, 19.08.2020. godine

ZAPISNIK sa 1. vanredne sjednice 6. saziva Općinskog vijeća Doboj Istok

Prva vanredna sjednica 6. saziva Općinskog vijeća održana je dana 14.08.2020. godine u zgradi općine Doboj Istok, u Klokotnici, sa početkom u 15,00 sati.

PRISUTNI: 15 vijećnika, Kemal Bratić, općinski načelnik, Omer Hadžić, sekretar općine, Abdulah Hrnjičić, ovlašteno lice da zamjenjuje pomoćnika općinskog načelnika za prostorno uređenje, te predstavnik RTV TK.

ODSUTNI: Mirzet Mujkić, vijećnik SDA i Fajik Muratović, vijećnik SDP.

Sjednicu je otvorio i vodio predsjedavajući Općinskog vijeća, dr. Ferid Konjić.

Dr. Ferid Konjić, predsjedavajući Općinskog vijeća: „Selamim načelnika sa saradnicima, vijećnike i vijećnice. Prije sjednice novi član Općinskog vijeća Omer Sofić će dati svečanu izjavu. Molim Omera da izađe i da da svečanu izjavu.“

Omer Sofić, vijećnik SBiH: „Ja Omer Sofić, svečano izjavljujem da ću povjerenu dužnost obavljati savjesno i odgovorno, pridržavati se Ustava i zakona Bosne i Hercegovine, Federacije Bosne i Hercegovine, Tuzlanskog kantona, te Statuta općine Doboj Istok, zalagati se za ljudska prava i slobode, za ravnopravnost građana i da ću u svim prilikama štiti interese i boriti se za izgradnju i napredak općine Doboj Istok.“

Dr. Ferid Konjić, predsjedavajući Općinskog vijeća: „Ja ispred Općinskog vijeća i u svoje lično ime čestitam Omeru Sofiću i želim mu dobrodošlicu u ovaj saziv Općinskog vijeća i nadam se da ćemo biti u saradnji. Izostanak je najavio Mujkić Mirzet i molim tehničkog sekretara da nam provjeri prisutnost vijećnika. Prisutno je 15 vijećnika, a odsutan je i Fajik Muratović.“

USVAJANJE ZAPISNIKA SA 37. REDOVNE SJEDNICA

Dr. Ferid Konjić, predsjedavajući Općinskog vijeća: „Imamo Zapisnik sa 37. redovne sjednice i ukoliko ima primjedbi na sam zapisnik dajem mogućnost da se iznesu. Ne vidim prijavljenih i dajem na izjašnjavaње. Ko je za zapisnik?“

Glasanje: ZA – 15, PROTIV – 0, UZDRŽANIH – 0.

VIJEĆNIČKA PITANJA I INICIJATIVE

Dr. Ferid Konjić, predsjedavajući Općinskog vijeća: „Ukoliko ima pripremljenih vijećničkih pitanja i inicijativa dajem mogućnost da se iznesu.“

Emira Karić, predsjednica kluba vijećnika SDP: „Pozdravljam i selamim prisutne. Valjda je tok vanredne sjednice, kako vidim, kao i tok redovne sjednice, mada je malo diskutabilno da li bi ovo trebala biti redovna ili vanredna da se razumijemo, ali to ćemo nekom drugom prilikom. Ja sam pripremila i vijećničku inicijativu i vijećničko pitanje, pa ću pročitati, odnosno krenut ću od vijećničke inicijative. Shodno dopisu udruženja iz Srebrenice da se u svim općinama i gradovima Federacije Bosne i Hercegovine jednoj ulici, trgu ili zgradi da naziv Žrtava srebreničkog genocida podnosim inicijativu da se Javnoj ustanovi Dom zdravlja Doboj Istok da naziv Javna ustanova Dom zdravlja žrtava srebreničkog genocida. Mi smo na prošloj redovnoj sjednici imali sličnu vijećničku inicijativu, odnosno davanje naziva sportskoj dvorani i vijećnik koji je podnio inicijativu dobio je odgovor od strane Ministarstva, ja ne znam

da li su drugi vijećnici upoznati, jer u materijalima kod mene nije došao odgovor na vijećničku inicijativu vijećnika Hasana Hasančevića, pa ne znam da li je ostalima. Na Kolegiju smo imali priliku vidjeti i odgovor je negativan, odnosno slovo zakona kaže da se sportskim dvoranama ne može dati taj naziv, odnosno školi. Da li će se zakon mijenjati ili neće, a zakon je donijela Stranka demokratske akcije, pa pružam priliku nekima da kažu stav Stranke demokratske akcije. Znači trenutna i prijašnja vlast donijela je takvu vrstu zakona. Mislím da ne treba čačkati po tome i prihvatit ću takav zakon kakav jeste, a da li će biti inicijativa od strane ovog Vijeća da se to mijenja. Ja evo podnosim vijećničku inicijativu i podsjećam da je inicijativa vijećnika Hasana Hasančevića podržana u potpunosti osim vijećnika koji nisu prisustvovali tog sjednici. Ja sama nisam bila za taj naziv sportskoj dvorani, ali sam podržala kolegu kao kolegu, pa sam htjela da vidim kako će to sve da izađe. Što se tiče vijećničkog pitanja ja sam ovo pitanje postavila na on lajn sjednici. Gospodin načelnik mi je dao korektan i konkretan odgovor, ali je prošao određeni period pa ću ja ponoviti pitanje. Koliko je općina Doboj Istok dobila pomoći sa viših nivoa vlasti kada je u pitanju sprečavanje širenja pandemije uzrokovane COVIDOM - 19? Takođe, koliko će općina Doboj Istok u narednom periodu dobiti pomoći za gore navedeno? Zašto podnosim ovo vijećničko pitanje? Upravo zato da i sami načelnici pokrenu prema višim nivoima ovu problematiku. Ne znam koliko pratite, ali Srbija i Hrvatska su dobile ogromnu pomoć od strane Svjetske zdravstvene organizacije. Ja ću biti konkretna pa ću reći da sam u Zagrebačkoj županiji, baš u mjestu Jastrebarsko gdje sam ja odrasla, vidjela taj veliki lager u kojem stoje i maske i sredstva za dezinfekciju, pa sam pomislila da može biti svim zemljama na Balkanu, koliki je taj lager. Znači Svjetska zdravstvena organizacija daje pomoć već izvjesno vrijeme, a ja to nisam čula za Bosnu i Hercegovinu. Gdje se ta pomoć nalazi? Ja se samo nadam da ta pomoć nije već na policama u nekim supermarketima, odnosno da naši roditelji u septembru mjesecu neće kupovati tu vrstu pomoći po tim supermarketima i apotekama. Tako da eto postavljam, jer mislim da imam pravo postaviti vijećničko pitanje i da upravo sami načelnici potežu dalje isto pitanje.“

Hasan Hasančević, predsjednik kluba vijećnika SDA: „ Zato što je vanredna sjednica neću ulaziti u replike, međutim moram pojasniti. Prvo ću sve da vas poselamim i pozdravim. U odgovoru koji je došao o ministrice nije odgovor negativan, a ni pozitivan. Onaj ko zna čitati njemu je dovoljno i možda kolege i kolegice koji nisu pročitali to ne znaju, ali stoji da ministrica donosi odluku o nazivu na prijedlog x,y osobe, ustanove ili bilo kojeg tijela. Stoji tamo što stoji i nije bitno, jer sam na Kolegiju ja bio korektan i kazao da ću ja nastojati do kraja mandata da istjeram to na čistac. Samo da podsjetim da ni jedna stranka ne donosi zakone, zakone donose organi skupštine kantona, Federacije i države, tako da o tom dijelu neću više polemisati. Klub vijećnika SDA neće podržati ovu inicijativu od kolegice Emire sve dok ne dobijemo negativan odgovor da kažu vi ne možete to nazvati tako i tako. Ako bude drugačije onda ćemo podržati.“

Izet Hodžić, predsjednik kluba vijećnika GDS i nezavisni vijećnik Sajib Mešić: „ Poštovani načelnice sa saradnicima, uvaženi predsjedavajući, dopredsjedavajući, kolege vijećnici i vijećnice, predstavnici sedme sile ja želim iskreno sve da vas poselamim i pozdravim. Mislím da sam tok sjednice nije kako treba. Ovo je vanredna sjednica i mislim da ne bi trebalo biti vijećničkih inicijativa i vijećničkih pitanja i da se ne bi trebao mijenjati dnevni red. Znači vanredna sjednica ima jasno definisan dnevni red i sve ostalo treba da ostane za redovnu sjednicu. To je moje mišljenje. Znači ovo je vanredna sjednica i jasno je na Kolegiju definisan dnevni red i jasno je rečeno zbog čega je ona definisana kao vanredna sjednica. Druga stvar meni je takođe žao što nemaju dopis ovdje od ministrice svi vijećnici na stolu, jer su članovi Kolegija Općinskog vijeća imali taj dopi i vodila se rasprava možda nekih pola sata do 40 minuta o tom dopisu. Behara može iskopirati, nije problem da se iskopira, jer tamo nije rečeno ni da može ni da ne može. U zadnjem pasusu tog dopisa ne piše da škole da ne mogu nositi naziv ako je vezano za datum, događaj, naziv jedinice, naziv pojedinca i svega ostalog i diskutovao sam na Kolegiju, jer nekim nije jasno, a meni je sasvim jasno da ne mogu nositi naziv ako vrijeđa druge narode. Tako decidno stoji. Znači ako taj naziv, ako taj datum, ako ta jedinica iz prošlog rata, ako to ime vrijeđa druge narode. Sportska dvorana žrtava srebreničkog genocida ne znam koga bi trebalo da vrijeđa. Ja se ne bih složio sa kolegicom Emirom, nisam ničiji pravni zastupnik, zakon nije donijela jedna stranka, ovo je Skupština Tuzlanskog kantona donijela, nije SDA donijela. Ja želim da kažem da je Skupština Tuzlanskog kantona donijela taj zakon i prečišćeni tekst u ovoj godini. Kažem šteta je što nemamo taj odgovor, ali kažem i da uopšte ne bi trebalo na vanrednoj sjednici o ovim stvarima raspravljati.“

Emira Karić, predsjednica kluba vijećnika SDP: „Ja ću se malo kockati sa vijećnikom Izetom i reći de vi meni objasnite zbog čega je ovo vanredna sjednica, pa ćemo mi povući vijećničku inicijativu i vijećničko pitanje. Znači tačno i decidno mi objasnite zbog čega se ova sjednica danas zove vanredna. U uvodnom

dijelu sam rekla hajmo li – la se dogovoriti, nije ovo vanredna sjednica zaista. Postoje neke hitnosti itd. i ima nekih osnova da se zaista održi ova sjednica, ali je mogao Kolegij donijeti da bude redovna, pa bi poštovali ne pravilnik nego poslovnik. Tako da smo prećutali u tome da li je vanredna i da li imamo pravo na vijećničko pitanje. Kažem ako mi sada ovdje odgovorite decidno i jasno zbog čega je ovo vanredna sjednica ja ću povući i vijećničko pitanje i vijećničku inicijativu. Nisam htjela ići u srž toga da objašnjavam zbog čega je donesen taj zakon, a baš sam se i prisjetila i vratila misli na neki određeni period. Da znate da su od strane školskih odbora i od strane vijeća roditelja krenule neke inicijative o nazivima škola prema Ministarstvu u Tuzlanskom kantonu. Onda su tu dolazila različita imena iz narodno oslobodilačke borbe i iz perioda koji nas je zadesio, odnosno agresije na Bosnu i Hercegovinu. Jako je puno bilo rasprava vezano za to i od strane akademske zajednice i od strane samih zastupnika Skupštine Tuzlanskog kantona šta je dobro, šta nije i onda je jednostavno presječeno i rečeno ne. Hajde da ne čačkamo u te stvari, jer mi ne znamo je li multinacionalna škola ili nije. Ne kažem da šta vrijeda ili ne vrijeda, možda vrijeda i uspomena tog samog naroda kada čuje da je naziv taj i taj. Mislim ne znamo šta to znači da li vrijeda jedan narod ili vrijeda taj narod koji je to doživio i to je sporno u tom slovu zakona. Tako da to zaista neće uspjeti proći, a ja vas neću uopšte pokušavati nagovarati. Po 100 put niste u pravu, po 100 puta ne pokazujete svoje fino lice i ponašanje, kao što to zna opozicija. Još ovaj puta, sve što nekako želimo da se dogovorimo vi to ne želite. Hasko, nisam bila za sportsku dvoranu, ali lično radi tebe hajde neka prođe inicijativa Hasana Hasančevića, a evo ti imaš problem. Ok, inicijativa neće proći u ovom sazivu i možete odgovoriti tim srebreničkim udruženjima da ovaj saziv nije bio dovoljno dobar, odnosno dovoljno intelektualno sposoban da donese neki naziv kako su oni zahtijevali.“

Kemal Bratić, općinski načelnik: „ Ja bih zamolio predsjedavajući, da svi nose maske.“

Izet Hodžić, predsjednik kluba vijećnika GDS i nezavisni vijećnik Sajib Mešić: „ Ja sam mislio na početku reći, ali uvrijedit će se ostali, ne znam je li obavezno nošenje zaštitnih maski na ovakvim skupovima. Mislio sam da će se uvrijediti kolege, jer će misliti da se na vanrednim sjednicama ne nose maske. U životu se ne kockam kolegice Emira, vi se možete kockati, ja se ne kockam. Mi smo na Kolegiju donijeli da sjednica ima vanredni karakter. U pozivu piše da se saziva 1. vanredna sjednica i ne vidim zašto vi to meni spočitavate. Kolegij je donio odluku, Kolegij je utvrdio vrijeme održavanja, Kolegij je utvrdio karakter sjednice, Kolegij je utvrdio dnevni red sjednice i zašto se vi sada obraćate meni. Znači po pozivu svim kolegama vanredna je sjednica. Ne vidim razloga zašto da ja vama dajem odgovor zašto je vanredna sjednica, a vi bili na Kolegiju i izglasali da je vanredna sjednica.“

Hasan Hasančević, predsjednik kluba vijećnika SDA: „ Koliko je naš intelektualni sklop jaki mi znamo ko je agresor, ko je žrtva, ko je ubijao, ko je radio protiv države, ko je dio imena kakva. Znači nemamo u intelektualnom sklopu i nemojte da se vrijeđamo, molim vas. Ova država je natopljena krvlju šehida i srebreničkih žrtava, ja sam tebe slušao dovoljno. Ne možete se tako ponašati na naziv nečega, a nisam mislio izlaziti. Koji narod vi štite ovdje da ja vas pitam? Ja vas pitam sada za govornicom i odgovorite medijima koji narod vi štite?“

Emira Karić, predsjednica kluba vijećnika SDP: „Kolega Hasane, govorim da mi nismo bili intelektualno sposobni da donesemo naziv. To je pogrdno. Mi. Ja ne štitim ničiji narod, evo štitim bošnjački narod time da damo naziv u ovom sazivu. Kuda skrećeš temu? Koji narod štiti? Štitim sve narode. Mi smo multinacionalna država i svi se narodi trebaju štiti. Neću više na tu temu.“

Kemal Bratić, općinski načelnik: „ Prije svega bih želio gospodinu Sofiću poželiti uspješan rad i dobro odlučivanje. Naravno žao mi je što je krenulo u ovom pravcu, jer sam mislio da će se završiti za pola sata, ali eto tako je kako je i na kraju krajeva kako neko reče plaćeni smo za to. Zamolio bih prije svega kao komandant Općinskog štaba civilne zaštite da se prilikom obraćanja stavljaju maske. Iz dana u dan se pogoršava situacija i danas su još tri pozitivna na našoj općini tako da procenat polako raste. Bilo bi veoma ružno da se pojavi klaster ovdje sa ove sjednice. Da li je sjednica hitnog karaktera trebala da bude ili ne, ja mislim da jeste. Da li je hitno? Ja mislim da jeste. Da li je značajno? Ja mislim da jeste. Ako neko misli drugačije, to je njegovo demokratsko pravo. Nama je ovdje bitan svaki dan, jer nažalost to nismo uspjeli prije, ali mislim da ni sada nije kasno. Cilj nam je da ta djeca od nove školske godine krenu, ako budu išli u klupe, ako ne onda će imati organizovanu on lajn nastavu ili neku platformu. Malo sam razgovarao i konsultovao se vezano za ovaj naziv i neću da palim vatru i nemojte da to izazove nekoga slučajno, ali mislim da će naziv naša dvorana dobiti takav kakav jeste. Ono što sam ja razumio, a neki

pravници sa kojima sam razgovarao tako misle, da nema nikakve zakonske smetnje. Nije dobro da sada to politiziramo, a možda i ne politiziramo, možda je dobra namjera, ali ja mislim da nije dobro. Odgovor uvažena vijećnice na vaše pitanje od one on lajn sjednice ostaje isti. Evo da vam ne pišem, jer ono što znam jeste da je federalna Vlada donijela odluku da će općina Doboj Istok dobiti 125.000 KM pomoći za sanaciju budžeta ili evo COVID-a kako oni kažu. Sve ono ostalo što će općina Doboj Istok dobiti bit će vezano za projekte. Pa evo pošto vi radite u Maloj Brijesnici da u jagmim muštuluk da vam kažem da ćemo, ako Bog da, početi i sportsku dvoranu u Maloj Brijesnici. Dobili smo dio sredstava, jer sam ja kao općinski načelnik aplicirao ciljano, jer smo obećali tamo toj djeci. Mislim da je i to značajan projekat koji ćemo uraditi, odnosno započeti raditi u ovoj godini. Ja bih vas molio da se ne izjašnjavamo o inicijativi. Lijepa je i ova inicijativa da to bude Dom zdravlja, ali nemojte da preklapamo. Ja mislim da će sportska dvorana, a već je napisano sportska dvorana samo ostaje onaj drugi dio, jer nekome se ne sviđa da ona nosi naziv Doboj Istok. Zašto? Ne znam. Stvarno ja ne mogu da shvatim te umove kojima smeta da stoji kao da Velika Brijesnica nije sastavni dio Doboj Istoka. Ima nas svakakvih, nažalost, ja vjerujem da će se to mišljenje nekada u budućnosti promijeniti. Predsjedavajući, ponovo podvlačim da se maske koriste pogotovo ovdje i zatražio bih 2 minute da se dezinficira, ako ništa, onda ova govornica.“

Mehmed Mehinović, predsjednik kluba vijećnika SBiH: „ Jednostavno ne može čovjek da se ne uključi kada su ove inicijative u pitanju. Naravno imam i ja svoje mišljenje kada je to u pitanju, da se niko ne ljuti. Nekada ispada kada god Emira nešto predlaže da je napadnemo sa svih strana. Ona uopšte nije ovom inicijativom rekla da ne treba dati nekom objektu naziv Žrtve srebreničkog genocida i ja mislim da treba. Ja nisam bio na prošloj sjednici Vijeća i vjerovatno bih podržao Hasanovu inicijativu, ali bih predložio nešto i svoje, da se sprovede javna rasprava da se vidi koji će objekat dobiti taj naziv. Kao čovjek koji je u ratu bio ovdje i poslije rata i koji sebe smatra patriotom uopšte se ne libim da neko dobije taj naziv. Mislim da niko ovdje nije protiv da dobije neko naziv taj, samo da se sprovede javna rasprava da vidimo koji je to objekat. Ako neko može davati naziv Karadžić studentskim domovima ili Mladić ili ne znam šta možemo i mi nekom objektu dati i uopšte nemam sa tim problema. Kada se radi o sjednici da li je vanredna ja sam mislio kroz ove odluke da stvarno sjednicu treba održati. Ja sam na Kolegiju diskutovao i pitao je li po Poslovniku da se održi vanredna ili redovna s obzirom na tematiku dnevnog reda. Odlučili smo i ja sam za to glasao iako i dalje imam svoje mišljenje da bi trebala biti redovna sjednica, brzinska redovna sjednica i nikakav nije problem da se održi brzinska sjednica. Vanredna je tačno definisana pod kojim uslovima i zašto se saziva, ali sam glasao da bude vanredna sjednica i ja to podržavam, jer hoću da učestvujem u ovom. Kada je u pitanju ovaj objekat imam mišljenje, dobar je i Hasanov prijedlog, dobar je i Emirin prijedlog i ja sam išao da predložim zaključak da se sprovede javna rasprava od mjesec – dva dana, da služba za društvene djelatnosti sprovede javnu raspravu i da vidimo sa građanima kome treba dati, a nesporno je da treba dati taj naziv.“

Dr. Ferid Konjić, predsjedavajući Općinskog vijeća: „ Ima li još vijećničkih inicijativa ili pitanja? Nema. Ja sam dobio ovdje vijećničku inicijativu i ja ću je pročitati i dati na glasanje. Svima je jasno sve ovdje i evo vijećnička inicijativa. Shodno dopisu udruženja iz Srebrenice da se u svim općinama i gradovima Federacije Bosne i Hercegovine jednoj ulici, trgu ili zgradi da naziv Žrtava srebreničkog genocida podnosim inicijativu da se JU Dom zdravlja Doboj Istok da naziv JU Dom zdravlja žrtava srebreničkog genocida. Nije JU nego je JZU i ja imam svoje mišljenje o formalnoj ozbiljnosti. Dajem na izjašnjavanje. Ko je za ovu inicijativu?

Glasanje: ZA – 5, PROTIV – 0, SUZDRŽANIH – 10.

USVAJANJE DNEVNOG REDA

Dr. Ferid Konjić, predsjedavajući Općinskog vijeća: „ Dobili ste dnevni red za ovu sjednicu, a nismo dobili nikakvih prijedloga dopuna i dajem na izjašnjavanje. Ko je za ovaj dnevni red?

Glasanje: ZA – 15, PROTIV – 0, UZDRŽANIH – 0.

Konstatujem da je jednoglasno usvojen je sljedeći:

DNEVNI RED

1. Razmatranje i usvajanje prijedloga Odluke o davanju na korištenje zgrade i zemljišta uz zgradu područne osnovne škole u Lukavici Rijeci JU OŠ „Klokotnica“ iz Klokotnice,

2. Razmatranje i usvajanje prijedloga Odluke o zamjeni nekretnina,
3. Razmatranje i usvajanje prijedloga Odluke o utvrđivanju javnog interesa za rekonstrukciju, rehabilitaciju i sanaciju lokalne ceste „Klokotnica- Lukavica- Kapetani“ u Klokotnici,
4. Razmatranje i usvajanje prijedloga Programa o izmjenama i dopunama Programa rada Općinskog vijeća Doboj Istok za 2020. godinu.

REALIZACIJA DNEVNOG REDA

Ad. 1. Razmatranje i usvajanje prijedloga Odluke o davanju na korištenje zgrade i zemljišta uz zgradu područne osnovne škole u Lukavici Rijeci JU OŠ „Klokotnica“ iz Klokotnice.

Dr. Ferid Konjić, predsjedavajući Općinskog vijeća: „ Materijal ste dobili, tačku dajem na diskusiju.“

Sajib Mešić, zamjenik predsjedavajući Općinskog vijeća: „Poštovani predsjedavajući, uvažene kolege i kolegice vijećnici i vijećnice, načelnice, predstavniče medija na početku bih prvo želio da čestitam kolegi na položenoj zakletvi i preuzimanju mandata i poželio mu uspješan rad. Vezano za 1. tačku dnevnog reda uočio sam, čini mi se, jedan nedostatak, ali predlagač će se vjerovatno o tome izjasniti. Kaže Odluka o davanju na korištenje zgrade i zemljišta uz zgradu područne osnovne škole u Lukavici Rijeci Osnovnoj školi „Klokotnica“ iz Klokotnice. Taj naslov bi vjerovatno mogao ostati, ali u zadnjem dijelu prvog člana kaže: JU OŠ „Klokotnica“ iz Klokotnice dužna je koristiti, a ja predlažem da se doda i održavati zgradu i zemljište uz zgradu u skladu sa njenom namjenom i zakonom. Ja pretpostavljam, a predlagač će vjerovatno pojasniti, da će se još neki ugovor praviti, a ovo je samo odluka Općinskog vijeća i mislim da bi bilo dobro da se navede i u samom ugovoru pored toga što se daje na korištenje da je dužna koristiti i održavati zgradu i zemljište. Intencija je bila da se danas sutra u nekoj mogućoj situaciji ta zgrada vrati nama ponovo u vlasništvo i mora biti održavana da ne bi bila u nekom stanju u kome ne bi trebalo da bude.“

Omer Sofić, vijećnik SBiH: „ Pozdravljam sve prisutne, medije kao i tehničko osoblje Općinskog vijeća. Ja neću ulaziti u ovu Odluku nego ću samo sinhronizovano kazati par riječi o izgradnji osnovne škole u Lukavici Rijeci. U programu rada od glavnih projekata na općini Doboj Istok osnovna škola Lukavica Rijeka je bila prijedlog broj 2. od 1997. godine. Sva općinska vijeća i sve institucije su uvijek davale velikog truda da se taj objekat završi. 2009. godine Općinska služba za društvene djelatnosti, branilačko invalidsku zaštitu i opću upravu je donijela jednu viziju odluke gdje je kazala da su neophodna sva sredstva da se ta škola izgradi, jer u tom momentu 2009. godine bilo 157 djece koja su išla pješice 4 km do Lukavice. Nakon te odluke od 2008 – 2014. godine Općinsko vijeće je donijelo odluku da se iznađu sredstva i kupi zemljište. Općina je obezbijedila sredstva i zemljište je kupljeno. Tu velika zahvalnost pripada svim vijećnicima u tom mandatu kao i predsjedavajućem kluba Stranke za BiH Sajibu Mešiću, doktoru Feridu Konjiću, kao i općinskom načelniku u tom momentu Mehmedu Mehinoviću i svim drugim vijećnicima. Kasnije se krenulo u borbu izgradnje, iako je bilo dosta pres službi u TK, na kraju smo došli do jednog koraka gdje zvanično možemo reći da smo blizu istorijskog značaja, odnosno izgradnje osnovne škole u Lukavici Rijeci. Ne mogu a da ne pomenem veliku borbu u ovom momentu i sve što je uradio u ovim mandatima općinski načelnik sa svojim službama, kao i ostali vijećnici. Na kraju molio bih da vijećnici podrže ovu odluku da građani Lukavice Rijeke imaju svoj istorijski momenat, da imaju svoju školu i da se stvore još bolji uslovi za opstanak i život na tim prostorima.“

Kemal Bratić, općinski načelnik: „Sve ovo što je Omer rekao uz jednu sitnu ispravku ja potpisujem. Ja sam to rekao i na roditeljskom sastanku koji smo tamo održali, uz samo jednu ispravku, da je 2013. godine isplaćeno to zemljište. Znači Vijeće je donijelo odluku, a 2013. godine smo isplatili zemljište i nakon toga smo ušli u jednu proceduru koja nam je uzela dosta dosta vremena, jer tamo je bilo dosta vlasnika. Ovo je što se kaže istorijski datum i naravno ja neću nikoga da molim neka svako glasa kako misli da treba da glasa. Smatram da ćemo mi ovim napraviti jedan doprinos našim građanima, odnosno našim mališanima u Lukavici Rijeci koji imaju priliku da imaju područnu školu kao što imaju na cijelom području naše općine na nekih 5 – 10 minuta maksimalno za razliku od sadašnje situacije. Ovo što želim da kažem jeste da će ta područna škola ispuniti uvjete da će biti čista odjeljenja i ovih zadnjih dana sam maksimalno uključen u razgovore i pregovore sa Ministarstvom obrazovanja tako da će tamo biti od 1 – 4. Moram da kažem, a to sam rekao i roditeljima, zna to Omer vrlo dobro, bilo je tamo i vidljivih i

nevidljivih neprijatelja da se to razvali i da se to nikada ne napravi, ali mi smo to izgurali. Ono što je najbitnije da imamo iskren nijet i da smo završili projekat. Ono što fali u područnoj školi Lukavica Rijeka je samo da učenici uđu u nju i da nastava započne. Naravno sa Ministarstvom sam dogovorio, mi smo uradili grijanje, a oni će kupiti kotao na pelet da naši učenici imaju fantastične uslove. Ja mislim da bi time završili kada se radi o obrazovnim ustanovama. Jednom ćemo staviti na papir koliko smo uložili na području naše općine što se tiče obrazovnih ustanova i kakve sada uslove imamo, a kakve smo imali prije 10 – 15 godina, a da ne govorim prije rata kada djeca nisu imala gdje maltene da šutnu loptu. Naravno ova odluka je značajna i formalno pravno škola će krenuti bila odluka ili ne bila. Škola je već ušla u registar Ministarstva obrazovanja tako da tu nema zakonskih smetnji. Direktor već dogovara da tamo pokrijemo nastavu i angažovanje tako da će to ići, ako Bog da, u dobrom pravcu. I Omer je imao značajan doprinos, jer je na neki način vršio pritisak na sve i prije mene, a i ja od kada sam za to zadužen. Vi imate pred sobom ovu staru Odluku i ja predlažem sljedeće da se samo ubaci k.č. i koliko kvadrata ima. To je na neki način tehnička greška. Evo ja ću vam pročitati. Pod 1. Ovom odlukom se daje pravo korišćenja zgrade i zemljišta uz zgradu područne osnovne škole u Lukavici Rijeci na parceli označenoj sa k.č. 553/2 zv. „Struke Luke“ Oranica/njiva 4. klase površine 1276 m² upisana u ZKU broj 1166 K.O. Lukavica Rijeka – vlasništvo općine Doboj Istok sa dijelom 1/1 u korist JU OŠ „Klokotnica“ iz Klokotnice za obavljanje nastave za učenike osnovne škole iz Lukavice Rijeke. Pravo korišćenja zgrade i zemljišta uz zgradu područne osnovne škole u Lukavici Rijeci traje od dana donošenja ove Odluke pa sve dok traje potreba za obavljanje nastave za učenike osnovne škole iz Lukavice Rijeke ili do donošenja Odluke o prestanku važenja gore navedene odluke. JU OŠ „Klokotnica“ iz Klokotnice dužna je koristiti zgradu i zemljište uz zgradu u skladu sa njenom namjenom i zakonom. Jedino ako hoćete da ubacimo i ovo Sajibovo i održavanje. Član 2. Ova odluka stupa na snagu danom donošenja, a objavit će se u “Službenim novinama općine Doboj Istok”. Znači samo da ubacimo k.č. i koliko je m², jer preciznije je.“

Dr. Ferid Konjić, predsjedavajući Općinskog vijeća: „Ko je za ovu Odluku?

Glasanje: ZA – 15, PROTIV – 0, UZDRŽANIH – 0.

Ad.2. Razmatranje i usvajanje prijedloga Odluke o zamjeni nekretnina.

Dr. Ferid Konjić, predsjedavajući Općinskog vijeća: „ Materijal ste dobili, tačku dajem na diskusiju. Ne vidim prijavljenih diskutanata i dajem na izjašnjavaње. Ko je za?

Glasanje: ZA – 15, PROTIV – 0, UZDRŽANIH – 0.

Ad.3. Razmatranje i usvajanje prijedloga Odluke o utvrđivanju javnog interesa za rekonstrukciju, rehabilitaciju i sanaciju lokalne ceste „Klokotnica- Lukavica- Kapetani“ u Klokotnici.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. Ne vidim prijavljenih diskutanata i dajem na izjašnjavaње. Ko je za?

Glasanje: ZA – 15, PROTIV – 0, UZDRŽANIH – 0.

Ad.4. Razmatranje i usvajanje prijedloga Programa o izmjenama i dopunama Programa rada Općinskog vijeća Doboj Istok za 2020. godinu.

Dr. Ferid Konjić, predsjedavajući Općinskog vijeća: „Materijal ste dobili, Kolegij je to pripremio. Ne vidim prijavljenih diskutanata i dajem na izjašnjavaње. Ko je za?

Glasanje: ZA – 15, PROTIV – 0, UZDRŽANIH – 0.

Na ovaj način smo iscrpili današnji dnevni red. Hvala vam na učešću u radu.“

Sjednica je završena u 15,40 sati.

ZAPISNIČAR
Behara Hadžić

SEKRETAR
Omer Hadžić

PREDSJEDAVALAČI
OPĆINSKOG VIJEĆA
Dr. Ferid Konjić

Službena zabilješka:

Zapisnik je usvojen na 38. redovnoj sjednici Općinskog vijeća Doboja održanoj dana 26.09.2020. godine.

U Klokotnici, dana 28.09.2020. godine

*Zabilješku sačinio
Omer Hadžić, sekretar Općine*